



## Allahova moć u stvaranju i obaveza zahvaljivanja na Njegovim blagodatima (Medina)

Hatib: dr. Husejn ibn Abdulaziz Alu Šejh

25. ševval 1443. po Hidžri / 27. maj 2022.

Hvala Allahu na Njegovim blagodatima koje se ne mogu pobrojati. Svjedočim da nema boga osim Allaha, jedinog, Koji druga nema, na ovom i budućem svijetu, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik, odabrani vjerovjesnik i rob. Allahu moj, smiluj se, spasi i blagoslovi Muhammeda, sallallahu alejhi ve sellem, i njegovu porodicu i ashabe, dobročinitelje, bogobojazne. O muslimani, oporučujem sebi i vama da se samo Allaha bojimo. Uzvišeni kaže: "I onim, što vam je potrebno za put, snabdijte se. A najbolja opskrba je bogobojaznost." (El-Bekara, 197)

O muslimani, u Kur'anu je veliki broj ajeta u kojima se naređuje posmatranje Allahovih znamenja u kosmosu. Koliko je samo jasnih pouka i upečatljivih poruka u tome! Uzvišeni kaže: "On čini da noć i dan naizmjenice nastupaju i u tome je, doista, pouka za one koji pameti imaju." (En-Nur, 44) Veličanstveni su znakovi i fascinantni dokazi veličine i moći Stvoritelja, Njegove jednoće i da je On jedini dostojan obožavanja i da Mu nema ravnog.

Onaj ko razmišlja o Allahovim stvorenjima i ljepoti Njegovih djela postaje svjesniji i ubjeđeniji u svoga Gospodara, povećava se i učvršćuje njegovo vjerovanje da On, jedini, stvara, upravlja, raspolaže, određuje i vlada i da samo On posjeduje svu moć i mudrost, stoga je obaveza Njegovih robova da Ga istinski obožavaju i u potpunosti se predaju Njegovoj volji i budu Mu pokorni i ponizni prema Njemu. Opisujući Svoje predane robove, Uzvišeni kaže: "U stvaranju nebesa i Zemlje i u izmjeni noći i dana zaista su znamenja za razumom obdarene, za one koje i stojeći i sjedeći i ležeći Allaha spominju i o stvaranju nebesa i Zemlje razmišljaju. 'Gospodaru naš, Ti nisi ovo uzalud stvorio; hvaljen Ti budi i sačuvaj nas patnje u Vatri!'" (Ali Imran, 44)





O vjernici, čovjek je obavezan uzeti pouku iz promjenjivosti i prevrtljivosti stanja na ovom svijetu, prisjećati se Kuće vječnosti i biti svjestan prolaznosti i bezvrijednosti kuće u kojoj se trenutno nalazi. Srećan je onaj ko iz toga uzme pouku i to shvati. Uzvišeni kaže: "Iz milosti Svoje On vam je dao noć i dan; da se u njoj odmarate, a da iz dobara Njegovih privređujete i da zahvalni budete." (El-Kasas, 73)

O vjernici, upućen je onaj ko iskoristi ovaj svijet za ono što će mu koristiti na ahiretu, a obmanjen je onaj kome život prođe u igri, zabavi i nemarnosti prema Allahovim naredbama, pokornosti Njemu i Njegovom obožavanju. Uzvišeni kaže: "On čini da se noć i dan smjenjuju, to je pouka za onoga koji hoće da razmisli i želi da bude blagodaran." (El-Furkan, 62)

O vjernici, jedna od pouka je smjena godišnjih doba, zime i ljeta, proljeća i jeseni. U velikim vrućinama čovjek se treba sjetiti vrućine i žestine džehennemske vatre i činiti ono čime je Allah zadovoljan i što će ga spasiti od Njegove srdžbe i kazne. Allah, džellešānuhu, govoreći o licemjerima, munaficima, i njihovom neopravdanom izostajanju iz borbe, kaže: "... i jedni drugima su govorili: 'Ne krećite u boj po vrućini!' Reci: 'Džehennemska vatra je još vruća!' – kad bi oni samo znali!" (Et-Tevba, 81)

Buhari i Muslim bilježe da je Allahov Poslanik, sallallahu alejhi ve sellem, rekao: "Vatra se požalila svome Gospodaru, pa je rekla: 'Samu sebe pojedoh (uništih)', pa joj je dopustio dva oduška, jedan zimi, a drugi ljeti. To su najveća vrućina i najveća hladnoća koju osjetite."

Poštovani vjernici, čuvajte se Dana kada će se ispuniti Allahovo obećanje i znajte da na ahiretu imaju samo dvije skupine: nesretni i sretni. Budi, Allahov robe, od bogobojaznih i u stalnoj pokornosti Gospodaru. Muslim bilježi od Mikdada ibn Esveda, radijallahu anhu, da je Allahov Poslanik, sallallahu alejhi ve sellem, rekao: "Sunce će se na Sudnjem danu približiti ljudima na udaljenost od jedne milje, pa će ljudi biti u znoju, shodno svojim djelima. Neki će biti u znoju do nožnih članaka, neki do koljena, neki do pojasa, a nekima će znoj dopirati do usta."





Buhari i Muslim bilježe da je Allahov Poslanik, sallallahu alejhi ve sellem, rekao: "Ljudi će se znojiti na Sudnjem danu toliko da će njihov znoj otići u zemlju sedamdeset lakata, i doprijet će sve do njihovih ušiju."

O vjernici, kao što koristite sva dostupna sredstva na ovom svijetu, da biste se spasili od neugodnosti vrućine i njene žestine, potrudite se, nastojte, koliko god je to moguće, da činite ono što će vas zaštititi od Allahove kazne i njenih strahota na ahiretu. Uzvišeni kaže: "Oni koji su se Allaha bojali bit će među izvorima, u gustim baščama i među voćem koje budu željeli. 'Jedite i pijte, prijatno neka vam je! – za ono što ste radili.' Tako ćemo Mi one koji čine dobra djela nagraditi." (El-Murselat, 41–44)

Naši dobri prethodnici bili su potpuno svjesni ove činjenice. Kada je Muaz ibn Džebel, radijallahu anhu, bio na samrti, bilo mu je žao, ali ne dunjaluka, nego noćnog namaza, sjedenja pred učenjacima i posta u vrelim ljetnim danima, a Ebu Derda, radijallahu anhu, govorio je: "Postite u vrelim danima pripremajući se za vrelinu Dana proživljenja, i klanjajte dva rekata pripremajući se za tminu u kaburu."

O vjernici, zaista su u smjeni godišnjih doba i promjenjivosti stanja na dunjaluku znamenja, pouka i podsjećanje na bezvrijednost i brzinu prolaznosti ovog svijeta i odredište Sudnjeg dana ka kojem se čovjek kreće. Poslanik, sallallahu alejhi ve sellem, rekao je: "Ko sam to ja i šta je dunjaluk! Primjer mene i dunjaluka je kao primjer konjanika koji putuje u vrućem ljetnom danu, pa se skloni u hlad drveta jedan trenutak, a zatim nastavi svoje putovanje i napusti taj hlad." (Sahih)

O muslimani, pripremite za sebe dobro, jer "za dobro koje za sebe pripremite naći ćete nagradu kod Allaha" (El-Bekara, 110).

O muslimani, naša je obaveza da zahvaljujemo Allahu, srcem i tijelom, na Njegovim neizmjernim i velikim blagodatima kojima nas je obasuo, kojih nije bilo u prošlosti, i da Mu zahvaljujemo na mnogobrojnim dobrima i nepresušnim nimetima. On nas je u ovim vremenima obdario sredstvima koja nam olakšavaju život i štite nas od raznih neugodnosti, kao što nikoga prije nas nije obdario. Enes, radijallahu anhu, rekao je:





“Klanjali smo sa Poslanikom, sallallahu alejhi ve sellem, a bilo je toliko vruće da bi neko od nas postavljao krajičak svoje odjeće na mjesto sedžde i na njoj činio sedždu.”  
(Buhari)

Koliko nam je samo potrebna spoznaja prava našeg Stvoritelja, izvršavanje Njegovih naredbi i ostavljanje uzroka Njegove srdžbe.

Uzvišeni kaže: “Sjećajte se vi Mene, i Ja ću se vas sjetiti, i zahvaljujte Mi, i na blagodatima Mojim nemojte neblagodarni biti!” (El-Bekara, 152)

Ko ispuni Allahovo pravo na zahvalnost, obožavajući samo Njega i pokoravajući se Njemu, On će mu još više blagodati dati, povećat će mu iz Svog dobra i usrećit će ga na ovom svijetu i nakon smrti. Uzvišeni kaže: “... i kad je Gospodar vaš objavio: ‘Ako budete zahvalni, Ja ću vam, zacijelo, još više dati; budete li nezahvalni, kazna Moja doista će stroga biti.’” (Ibrahim, 7)

Allah nam je naredio veličanstvenu stvar, da donosimo salavate i selame na našeg prvaka, vjerovjesnika i miljenika Muhammeda, sallallahu alejhi ve sellem. Allahu moj, smiluj se, spasi i blagoslovi Muhammeda, sallallahu alejhi ve sellem, i budi zadovoljan Njegovim ashabima i svima onima koji ih slijede u dobročinstvu do Sudnjeg dana.

